

Wanem tingting blong yu long saed blong politik?

[Wan long ol akta hemi stap sidaon long audience. Fo narafala akta oli wokbaot ikam insaed, tu I stap long fored mo tu behaen. Akta 1 hemi luk se tufala ya oli stap wokbaot slo slo mo hemi singoatem tufala.]

Akta 1: Wanem i rong?

Akta 3: Westem taem nomo!

Akta 4: Leko...

Akta 2: Yumi kam blong tokbaot samting ya! Bae yumi ko ahed! Ale! **[Akta 2 wetem Akta 1, tufala oli wokbaot kasem ples we audience I stap long hem. Akta 2 mo 3 oli stap behaen be oli no klad nating long wanem we fes tu akta oli stap mekem.]**

Akta 1: Helo olgeta! Mifala ikam tede blong finem aot sam samting long yufala!

Akta 2: Blong kasem ol tinktink blong yufala long saed blong...

Akta 1&2: Politik!

Akta 3: Hey! **[Hemi stap toktok long akta 1 mo 2.]** Oli man oli lez long toktok ya **politik!** Oli lez long hem!!

Akta 4: Oli woman oli no wandem save long politik nating!

Akta 3: Luk! Woman ya longwe hemi stap silip finis! **[Wan long ol akta we I stap long audience hemi giamen silip, be taem we oli toktok hemi wek up mo hemi luk luk raon.]**

Akta 4: Yumi no save tokbaot wan difren samting?

Akta 1: Politik hemi fasin blong ronnem kaontri ya!

Akta 2: Yu tink se ol man ya oli no kea long kaontri blong yumi?

Akta 4: Mifala ino talem se oli no kae.. be politik hemi.....wan rabis samting!

Akta 3: Mi no wandem save long politik! Olsem wanem long yufala? **[Hemi stap askem audience ya nao.]** Talem?! Yu wandem se mifala I tokbaot politik? **[Hemi kivim smol taem long audience.]** Hemia nao! **[Hemi stap toktok long ol narafala akta bakegen.]** Oli no wandem save nating!

Akta 1: Yu rong we yu rong! Yumi evriwan I stap tinktink strong long kaontri blong yumi! Long numba 30 July, yumi evriwan long kaontri ya I stap selebratem independen blong Vanuatu!

Akta 2: Vanuatu hemi kasem 24 yia finis! Yumi bin kasem independen blong yumi, 24 yia we I pass! Yumi evriwan I klad long indepens ya! Yumi proud long kaontri blong yumi, Vanuatu!

Akta 1: Ale! Bae yumi singsing long hem! Evriwan! Bae yumi singim national anthem blong yumi!

Akta 2: Wan tu tri!

Oli: Yumi, yumi, yumi i glad blong talem se,
Yumi yumi yumi ol man blong Vanuatu

God i givim ples ia long yumi,
Yumi glad tumas long hem,
Yumi strong mo yumi fri long hem

Yumi brata evriwan

Yumi yumi yumi i glad blong talem se,
Yumi yumi yumi ol man blong Vanuatu

[Taem we evriwan I finis ol akta oli klap bikwan.]

Akta 2: Oli save singsing we...

Akta 1: Olgeta ya.. numba wan!

Akta 2: Oli stap tinkbaot kaontri blong ol! Bae oli interes bikwan long fasin blong ronnem kaontri ya! **[Hemi stap toktok long akta 3 mo 4.]**

Akta 4: Ino minim se...

Akta 2: Ale bae yumi ko ahed nao!

Akta 3: Be politik I stap mekem ol man I kross! No kud oli ronnem aot yumi long ples ya!

Akta 1: No wari! Bae evri samting ioraet! **[Tufala narafala akta oli lukim olgeta mo oli harem no kud. Akta 1 hemi toktok long audience nao ya.]**
Wanem tinktink long yufala long saed blong politik?

Akta 2: Olsem wanem long ol politician?

Akta 2: Oli ol kud kudfala man?

Akta 3: O ol rabis man?

Akta 4: Yumi save trustim toktok blong ol?

Akta 5: Ono kat?

Akta 1: Wanem tinktink blong yu long saed blong democracy? We iminim se....

Akta 2: Yumi stap jusim ol lida blong yumi!

Akta 3: Yumi nomo yumi ronnem kovman blong yumi!

Akta 4: Yumi long kaontri ya yumi kat wan democratic kovman!

Akta 1: Yu tink se fasin ya blong ronnem kaontri ya hemi stap wok ono?

Harriet: Ino wok nating! **[Hemi stap sidoan insaed long audience.]** Ol politician oli stap ruffem yumi oltaem nomo! Mi mi lez long olgeta evriwan! Oli no kea nating long yumi ol manples! Itru no?

Akta 1: Kam long ples ya! **[Hemi stap toktok long Harriet.]**

Harriet: Mi?

Akta 1: Yes! Yu!

Harriet: No ioraet...

Akta 3: Bae yu kam...**[Tu long ol narafala akta oli ko from hem nao ya.]**

Harriet: Hey! Leko! Yu stap mekem wanem wetem mi?!

Akta 1: Mifala I wandem askem sam kweston nomo.. No fraet!

Harriet: Mi no bin minim blong.. Mi no save anserem ol kweston blong yufala tu!
Mi wandem sidaon bakegen!

Akta 2: No kik sista!

Akta 1: Talem long mifala fromwanem nao yu no likem ol politician?
Fromwanem nao yu tink se oli stap ruffem yumi?

Harriet: Kas! Yu no save?!

Akta 2: Be wanem kaen fasin stret ol politician nao oli stap mekem?

Harriet: **[Hemi tinktink smol.]** Oli stap giamen oltaem nomo! Taem blong elekson, oli stap promisem ol kaen kaen samting ... Bae oli mekem

- hemia.. hemia.. afta oli neva mekem wan samting nating! Yumi no stap lukim olgeta nating kasem nexis elekson! **[Hemi toktok long audience bakegen.]** Itru ah? I tru?
- Akta 3: Fromwanem nao oli stap mekem olsem?
- Harriet: From oli .. oli ol ruf man nomo! Oli no kae nating long yumi ol pipol! Yu tink se wanem? **[Hemi stap toktok long audience bakegen.]** Kas .. man ya hemi wan sathed littelbit..
- Akta 1: Yu tink se mi wan sathed ah?
- Harriet: No.. mi no.. mi no bin minim se... be sam long ol kweston ya! Eviwan I save ansa long ol finis!
- Akta 1: Bae yumi luk! Wanem nem blong yu?
- Harriet: Mi? Mi mi Harriet! **[Hemi sek han wetem akta 1 mo hemi wev long ol man long audience.]** Ale.. bae mi ko sidoan bakegen....
- Akta 1: Wet smol Harriet..**[Hemi pullum hem ikam bak.]** Yu talem se ol politician oli ol rabis man... Olsem wanem long yu? Yu wan kudfala woman o wan rabis woman?
- Harriet: Mi? Mi wan kudfala woman... mi no stap mekem ol rabis fasin! Mi no stap giamen tu!
- Akta 1: Yu no olsem ol politician ya?
- Harriet: Mi? No!
- Akta 2: Yu yu honese?
- Harriet: Yes...
- Akta 3: Yu no wandem ruffem ol man?
- Harriet: No!
- Akta 4: Yu wandem helpem ol man ples blong yu?
- Harriet: Mi wandem kivim han long ol... sapos we mi save mekem wan samting blong mekem laef blong ol man mo woman ples ya I kam mo kud.. bae mi mekem!
- Akta 3: Ikud! Bae yu yu helpem mifala!
- Harriet: Helpem yufala? Wanem nao yu wandem se mi bae mi mekem? **[Hemi stap fraet.]**
- Akta 1: Bae yu talem storian long wanem we yu bin mekem long mifala Harriet!
- Harriet: Mekem? Mi? Mi no bin mekem eni samting...
- Akta 2: Wanem nao yu bin mekem ova long las tri elekson!
- Harriet: Fromwanem nao yu wandem save?
- Akta 3: Bae yumi luk sapos we hemi ol politician we istap ruffem yumi..
- Akta 4: O yumi nomo yumi stap mekem ol fasin we ino stret!
- Harriet: Hemi ol politician! Ino mi! Mi no wan bikman! Mi wan woman! Ol woman oli no kat samting blong mekem long politik tu! Leko mi ko! Jusim wan man! Olsem wanem long man ya? **[Hemi pointem wan man long audience.]** Hemi save save plante mo samting bitim mi ..
- Akta 1: No Harriet! **[Oli tekem hem mo holem hem long mittel blong wan haf circle.]** Mifala I wandem save long *yu* nao!
[Oli stat blong sakem hem sloslo roan long circle, olsem we yu mekem long ol trust exercises. Harriet hemi stap singaot.]
- Akta 3: Trustim mifala!

Akta 2: Bae mifala ino save spolem yu!
 Harriet: Ahhh!
 Akta 3: Bae yumi lernem fulup samting!
 Akta 4: Bae yumi wok tugeta blong luk save sam samting long saed blong politik!
 Harriet: Ohhhh!
 Akta 1: Bae yu soemaot long mifala fromwanem nao yu hatem ol politician!
 Akta 2: Fromwanem nao yu talem se Democracy ino wok!
 Akta 3: Bae yumi ko bak long firs taem we yu bin kat janis blong vot!
 Akta 4: Long 1998! **[Oli stoppem blong sakem hem olbaot nao,]**
 Akta 1: Yu bin kat 18 yia long taem ya Harriet!
 Akta 2: Wanem nao yu yu bin mekem
 Ol: Long fes elekson we yu bin kat janis blong vot long hem!
[Oli stan up, mo Harriet hemi wokbaot olsem we hed blong hem I roan. Ol akta oli freeze smol, afta oli kam olsem ol man long vilij. Oli stap mekem ol dif difren wok we ol man long vilij I stap mekem. Taem we oli singsing oli mekem olsem we oli stap toktok long olgeta.]
 Sing sing:
 Helo olgeta!
 Olsem wanem long yu?
 Yu save nomo, semak olsem!
 De I pass naet ikam
 Be ol samting istap olsem!
 Wom: Wora ino kat long tap!
 Man: Dispenary ikat panadol nomo!
 Ol man mo woman oli stap komplain!
 Yumi independen hao mas yia
 Be laef ino stap jenis!
 Laef ino stap jenis!
 Yumi wandem kat wan skul!
 Wan klinik we istap kolosup!
 Wan rod we ino no kud olsem!
 Yumi wandem se
 Bae laef blong yumi I kam mo kud!
 Wan de laef ya bae I jenis
 Bae inomo semak olsem!
[Guitar iko ahed smol taem afta we oli singsing finis. Ol akta Oli ko aot wetem firwud o wanem. Harriet hemi ko ahed blong mekem wok blong hem. Afta wan man hemi wokbaot ikam insaed.]
 Ofisa: Helo ...
 Harriet: **[Hemi sek long man ya.]** Oh .. helo.. Yu wandem wan samting? Yu stap lukoatem wan man?
 Ofisa: : Mi kam long electoral ofis blong mekem regista blong ol nem blong yufala long vilij ya.. Mekem se yu save vot long elekson. Evri man o woman we hemi kat 18 yia finis, hemi save vot long ol national mo provincial elekson..
[Harriet hemi luk olsem we hemi konfus.] Mi mi kam blong mekem regista ya nao... Mi bin talem long jif se bae mi kam tede.. be ino kat man

I kam wet long nakamal .. afta mi bin tink se bae mi kam lukoatem sam man!

Harriet: Mi nomo mi stap.. ol narawan oli ko long karen..

Ofisa: Wanem nem blong yu?

Harriet: Harriet.

Ofisa: Yu kat hao mas yia?

Harriet: 18..

Ofisa: Yu kat raet blong vot nao Harriet! Be bifo we yu save vot, nem blong yu I mas stap long elektoral regista.

Harriet: Ohhh...

Ofisa: Bae mi tekem nem blong yu festaem.. afta bae yu kasem wan electoral kad ino longtaem.

Harriet: Be mi no sua se..

Ofisa: Yu kat raet blong vot Harriet. Sapos yu no wandem vot bae ino kat man I save punishem yu. Be hemi duti blong yu tu blong wok blong helpem koantri ya blong ron kud. Konstitusion blong yumi I talem olsem nao.

Harriet: Be hao nao mi save helpem koantri blong ron mo kud? Mi no bin skul kud.. afta mi..

Ofisa: Yu mas traem jusim ol kudfala lida blong koantri ya. Yu mas vot long wan man we yu save laef blong hem littelbit. Wan man we yu save se hemi hones, we hemi save wok blong helpem komuniti mo koantri.

Harriet: Mi? Mi mas mekem olsem? Ohh....

Ofisa: Harriet, bae yu putum nem blong yu long electoral rol ya?

Harriet: Ale... mi bae mi putum nem blong mi! **[Hemi wokbaot iko long electoral ofisa. Ofisa ya hemi karem aot wan bigfala buk we hemi stap raetem ol nem long hem.]**

Ofisa: Ale.. ful nem blong yu?

Harriet: Harriet David.

Ofisa: Wanem det nao yu bin bon long hem?

Harriet: 23 March 1977...

Ofisa: Harriet bae yu kasem wan electoral kad blong vot wetem long nexis elekson. Kad ya hemi kad blong yu wan nomo! Yu no mas kivim long eni narafala man! Mo yu mas vot folem tinktink blong yu wan! Ino kat wan narafala man we hemi save talem long yu hu nao yu mas vot long hem.

Harriet: Yes ofisa..

Ofisa: Kud luk Harriet! **[Ofisa ya hemi wokbaot iko.]**

Harriet: Ale kudbae ofisa! Bae mi mekem olsem we yu talem.. Tank yu tru! **[Wan akta hemi stan up mo hemi sigoatem Harriet.]**

Akta: Harriet! Kad blong yu ya nao!

Harriet: Kad ya nao! Mi bae mi vot long nexis elekson! Man! Mi bae mi helpem koantri ya blong ron kud! Bae mi mekem olsem we ofisa ya italem.... **[Hemi putum kad blong hem insaed long basket o dres blong hem. Sem taem wan akta hemi ron I kam insaed.]**

Akta 1: Elekson! Elekson! Oli talem se bae yumi kat elekson long March ya nao!

Harriet: Elekson?!

[Ol man oli kam insaed mo singsing nao. Bae oli singsing festaem afta oli tekem ol pat. Tri long ol akta bae oli mekem pat blong ol kandidate mo wan bae hemi mekem pat blong jif. Man ya we bae hemi mekem pat blong jif, hemi karem wan stik wetem hem.]

Sing sing:

Evri fo yia!
 Evri fo yia nao yumi jus
 Ol lida blong kaontri!
 Ol man
 O woman
 We yumi wandem se
 Bae oli representim yumi
 Long parliaman long kapital Port Vila!
 Evri fo yia
 Evri fo yia yumi mas tinktink kud
 Evri fo yia
 Yumi kat responsibility
 Blong jusim
 Ol man mo woman we
 Bae oli lidem kaontri blong yumi!

[Oli freeze I stap. Harriet hemi luk luk raon long ol man we oli toktok mo hemi stap konfus nao.]

Akta 1: Vot long mi! Mi nao mi save helpem yufala evriwan blong kasem developman!

Akta 2: Mi bae mi karem elektrik ikam!

Akta 3: I mas kat fri edukation long kaontri ya! Yumi ol parents yumi stap sava!

Akta 4: Vot long mi! Bae mi mi mekem sua se yufala evriwan I kat wok! Bae yu save winnim mane!

Ol: Vot long mi!

[Oli freeze I stap bakagen. Harriet hemi wokbaot long audience.]

Harriet: Kas! Hemi had blong jus....

Jif: Miting! Miting miting!

Harriet: Wanem ya?

Jif: Harriup! **[Hemi bangem stik blong hem long graon. Ol narafala akta oli sidaon. Harriet hemi kam sidoan las wan.]** Olgeta evriwan I stap?

Man: Yes jif!

Jif: Kud kud... Mi bin singaotem miting ya from elekson we istap kam! Yumi mas jusim wan kandidate we bae hemi save representim yumi long parliamen! Yumi mas jusim wan kudfala kandidate.. wan man we we bae hemi save helpem yumi plante!

Wom: I tru nomo jif!

Man: Hemi mas fiximup rod ya! Ol kakae blong yumi istap rotten long karen! Yumi no save karem iko long market blong salem!

- Jif: Yumi mas vot long wan kandidate we bae hemi save mekem evri samting we yumi wandem! Mi bae mi talemaot nem blong kandidate ya we yumi evriwan I mas vot long hem!
- Ol: Ahh? **[Ol man oli sek.]**
[Ol akta we oli stap long miting oli lukim olgeta. Wan man hemi liftimup han blong hem.]
- Man 2: Jif!
- Jif: Ko ahed!
- Man 2: Vot ya, hemi blong wan wan man... ino blong yu blong talem long mifala hu nao mifala I mas vot long hem! **[Harriet I stap lisen kud long man ya.]**
- Jif: Sapos we yumi stap vot long ol dif difren kandidate, wanem bae I happen? Bae ino kat wan stret kandidate blong yumi nating! Wanem bae i happen long MP allocation blong man we I win?
- Harriet: Allokation? Wanem ya?
- Wom: Lisen!
- Jif: Mane ya we MP we ol MP oli kasem blong ol man blong ol! **[Hemi stap anserem Harriet.]** Bae I ko long ol narafala vilij nomo! Bae yumi neva kat wan rod! O wan dispensary long ples ya!
- Ol: I tru... yes... **[Ol man oli toktok plante.]**
- Jif: Mi bin talem long fren ya se mi wetem wan hundred fifty man blong mi, bae mifala evriwan I mas vot long hem! Mo hemi bin promisem mi, se bae oli fiximup rod mo antap long hemia, bae oli bildim wan wharf, stret long ples ya! **[Ol man oli klad we oli klad.]**
- Man 2: Hemi stap talem tru ono?
- Jif: Bae yumi evriwan I vot long fren ya! Fren ya we hemi stap long parti we yumi stap vot long hem oltaem!
- Man 3: Ale jif! Bae mifala imekem wanem we yu talem!
- Wom: Bae mifala ifolem tinktink blong yu nomo jif!
- Jif: Ale! Bae yumi evriwan iko vot long kandidate blong yumi! Malele ho!
- Ol: Malele ho!
[Oli gerrup mo oli ko aot nao. Oli akta oli wokbaot iko wetem singoat blong pati. Harriet I gerrup las wan mo hemi toktok long hem wan.]
- Harriet: Be elektoral ofisa ibin talem se mi nao mi mas decide....
- Akta 3: Harriet! De blong vot nao! Bae yu kam! **[Harriet hemi tekem kad blong hem, mo hemi lukim kad ya.]** Harriet! **[Harriet hemi ron iko long fored blong akting aria. Wan narafala akta hemi kam insaed mo hemi kivim ol pepa long hem blong vot wetem.]**
- Akta 4: Bae yu karem aot pikta blong man ya we yu wandem vot long hem, putum pikta ya long envelop, afta yu sakem long box!
- Harriet: Bae mi raetem nem blong mi long envelop?
- Akta 4: No kat! Vot blong yu hemi sekret. Bae ino kat man I save se hu nao yu bin vot long hem! **[Hemi ko aot nao. Harriet hemi holem ol pepa, mo hemi luk luk smol, be afta hemi lez.]**

Harriet: Kas! Tumas man! Bae mi vot long man ya we jif ibin talem! Imo isi olsem!
[Hemi putum wan pepa long envelop mo hemi wokbaot iko. Sem taem Jif hemi wokbaot ikam mo hemi singaot.]

Jif: Hemi win! Kandidate blong yumi bae hemi ko insaed long bikfala nazara blong yumi! Bae hemi karem fulup samting I kam! Fulup samting!

Sing sing: Ale yumi dring!

Bae yumi hapi tede!

Evri samting istap ko kud!

Man blong yumi hemi win!

Bae hemi mekem se

Bae yumi kasem plante

Kud kudfala samting!

Bae hemi mekem se

Bae yumi kasem plante

Kud kudfala samting!

[Ol mekem olsem we oli drong mo klad. Singsing I finis be oli stat blong mekem ol wok blong ol nao. Sam oli mekem olsem we oli klinim karen, sam oli mekem olsem we oli katem firwud. Mo sam woman oli was. Afta hemi stoppem wok blong hem mo hemi lukim audience.]

Harriet: Wan yia I pass finis afta we mifala I bin putum MP ya long parliaman be...

Ol: Ino kat wan samting ijenis nating! **[Afta long toktok ya oli ko ahed blong mekem ol wok bakegen. Taem we Man I toktok oli lukim hem.]**

Man: Mi kat fulup kakae long karen ya.. be rod ino kud.. wharf ino kat! **[Hemi sakem kakae long solda blong hem.]** Bae ol kakae ya hemi save rotem nomo nao! **[Hemi wokbaot iko.]**

Harriet: Mo ol toktok I bin fli raon..

Chorus: Mi bin harem se

MP blong yumi hemi bin stihlim wan bikfala mane

Ohhh!

I kat wan ripot I kam oat

We italem wanem we hemi bin mekem!

Hemi bin spolem yumi!

Mo wan kusin sista blong mi...

Wanem? **[Oli stap askem akta we italem las line ya.]**

Hemi bin luk man ya kolosup long lagoon wetem wan woman!

Yu save nomo wanem we oli bin mekem!

Ohhh!

Wan rabis man stret!

Mo yumi evriwan I bin vot long hem! **[Oli kross mo oli ko aot.]**

Harriet: Ino kud ah? **[Hemi sekem hed blong hem. Nois blong ol man we oli toktok kross istap ko ahed iet.]** Be oli ko ahed blong mekem politik iet! Mi mi lez long samting ya finis. Politik! Ino wan samting! Mi mi mi kat fulup narafala samting blong tinkbaot! **[Wan yungfala man, Tom, hemi wokbaot ikam insaed.]** Mi bin finem wan man we mi mi likem

- hem...**[Man ya hemi tekem han blong Harriet. Harriet hemi lukim hem.]** Man ya nao!
- Tom: Bae yu kam woman blong mi nao Harriet!
[Oli akta behaen oli kam mo lukim tufala nao ya.]
- Oi: Ahhhh! Oli nis we!
- Harriet: Mitufala I marret nao mo mitufala ikat wan pikinini... **[Hemi mekem olsem we hemi holem wan bebe.]** Yu wan kudfala bebe tru! **[Hemi lukim audience bakegen.]** Ino longtaem be mifala I kat wan mo pikinini bakegen. **[Hemi kivim fes pikinini long man blong hem, afta tufala oli mekem olsem we oli stap karem tufala pikinini ya.]** Mi no kat taem blong tinkbaot politik! Lettem ol man oli wari from sapos we oli wandem! **[Hemi stap ko ahed wetem ol wok blong hem, mo sem taem hemi stap lukaotem wan giamen pikinini.]**
- Harriet: Hey! Samting ya hemi doti! Yu no kakae... Kam ya!
- Tom: **[Hemi putum gaimen pikinini iko doan kolosup long Harriet.]** Mi mas ko long nakamal Harriet..
- Harriet: Tom! Yu bin talem se bae yu ko long garen!
- Tom: Mifala I stap miting from politik!
- Harriet: Kas!
[Oli male akta oli kam insaed. Jif hemi stap stori taem we hemi wokbaot ikam wetem ol. Oli wokbaot krosem akting aria taem we oli stori. Harriet istap mekem ol wok blong hem behaen long ol taem we oli toktok. Harriet ino lukim ol nating.]
- Jif: Bae I kat vot blong no konfidens!
- Tom: Tru?
- Man: Wanem bae I happen nao jif?
- Jif: Kovman bae I jenis!
- Tom: Afta?
- Jif: Man blong yumi hemi mas stap long kovman saed! Sapos no bae yumi no save kasem wan kudfala samting nating!
- Man: Be hu nao I stap long kovman saed jif?
- Jif: Mi no kae! MP blong yumi i mas stap wetem ol!
[Oli wokbaot iko mo Harriet hemi stan up, mo hemi mekem olsem we hemi kat wan narafala wok blong mekem long fored blong akting aria. Oli male akta oli wokbaot ikam behaen long hem nao ya. Mo oli stap stori bakegen.]
- Jif: Yu no belivim giamen toktok ya!
- Tom: Mifala ino belivim jif.. be pepa I bin talem se..
- Man: Oli wandem daonem ol man ples blong yumi nomo!
- Jif: Hemia nao! Oli narawan oli stap mekem sem fasin, be oli no stap tokbaot ol rabis samting we oli stap mekem! Man blong yumi nomo!
- Man: Ino stret!
- Tom: Ino stret nating! **[Oli wokbaot iko aot nao.]**
[Harriet hemi lukim olgeta mo hemi kross smol. Hemi mekem olsem we wok blong hem ifinis.]

Harriet: Ale! Junior! Bae yumi ko long haos nao... **[Ikat bikfala nois behaen.]**
Wanem ya?

Akta 1: Hemi yia 2002! Taem blong elekson!

Akta 2: Oli kandidate oli stap kam!

Akta 3: Oli kam wetem tin fis!

Akta 4: Saucepan!

Akta 1: Busnif!

Akta 2: Oli kam wetem fulup samting!

Akta 3: Yumi laki tru long elekson ya!

Akta 4: Mo luk longwe! MP blong yumi hemi stap kam!

Akta 1: Bae hemi karem wanem blong yumi?

[Akta, we bae hemi pleem MP blong ol, hemi kam insaed.]

MP: Olgeta! **[Oli man oli kam sidoan raon long hem. Harriet wetem ol woman oli stan up long wan saed.]** Mi kam blong talem tank yu long sapot blong yufala ova long ol yia ya.

Jif: Ikud ikud...

MP: Bae mi askem yufala blong vot long mi bakegen long elekson ya!

Jif: Bae mifala ivot long yu!

Oli: Malele ho! Malele ho! Malele ho!

MP: Mi bin had wok ova long las fo yia, blong mekem se koantri ya I save kat wan kudfala futa! **[Oli woman oli lukim olgeta.]** Mi save se sam long yufala I wandem stori mo longsaed blong wok blong kovman.. mo mi bin karem kava I kam.. blong mekem se yumi save sidaon stori kud tugeta! **[Oli man oli klad. Oli woman oli kross.]** Mi bin payem kakae tu! Oli woman! Bae yu kam karem kakae ya.. mo mekem iredi. Bae yumi evriwan I kakae tugeta tunaet..... afta long kava! **[Oli man oli laf mo slappem baksaed blong ol.]**

Harriet: Kas.... Wok bakagen!

MP: Oli woman! Kam karem ol kakae ya! **[Hemi toktok long ol man nao.]** Ale! Bae yumi dring! **[Oli man oli stan up mo oli ko from kava. Jif hemi wokbaot iko blong toktok long MP ya.]**

Jif: Bae oli vot long yu bakegen .. yu no wari.. **[Hem wetem MP oli ko oat blong dring kava nao.]**

Wom: Oli vot from kava nomo!

Harriet: Mi lez long elekson ya finis!

Wom: Man ya ino bin kam bak long vilij ya! Hemi no bin mekem wan samting nating blong yumi long ples ya!

Harriet: Mi no likem fasin blong hem tu...

Wom: Mi bae mi no vot long hem.. olsem wanem long yu?

Harriet: Mi no ting....

Tom: **[Hemi ron ikam insaed.]** Harriet! Oli man blong pati oli wandem karem ol kad.. Kivim kad blong yu.

Harriet: Elektoral kad blong mi? Be yumi no mas kivim ol kad ya long eni narafala man Tom!

Tom: Olgeta blong pati oli wandem jekim ol kad ya nomo!

Harriet: [**Hemi tinktink smol.**] Okay... [**Hemi lukim woman we I stap kolosup long hem. Tufala oli karem aot electoral kad blongol mo kivim long Tom.**] Ya..

Tom: Blong yu?

Wom: Hemia.

Tom: Ale! [**Hemi karem tufala kad mo hemi wokbaot iko.**]

Wom: Bae yu karem kad ya ikam bak bifo long elekson?

Tom: Be yes! [**Hem iko aot.**]

[**Harriet mo Wom oli stap lukim olgeta. Chorus ikam insaed bakegen.**]

Chorus: Ale evriwan!

Hemi de blong vot!

De blong elekson blong yumi!

Hemi raet mo duti

Blong yumi evriwan

Blong jusim ol lida blong kaontri!

Ale! Bae yumi ko vot....

Olsem wanem long yufala?

[**Oli pointem Harriet mo woman ya.**]

Bae yufala ivot ono?

Harriet: Oli bin karem kad blong mi!

Wom: Oli neva bin karem ikam bak!

[**Chorus oli lukim tufala strong fes nomo afta oli los.**]

Wom: Oli bin mekem wanem wetem ol kad ya?

Harriet: Mi no save .. be mi mi klad tumas se ino kat elekson bakegen blong narafala fo yia!

Wom: Yu tru! [**Hemi ko aot.**]

Harriet: Mi bae mi wari long tufala pikinini blong mi nomo.. Bae oli skul kud! Bae oli kat wan kudfala futa... Bae mi wok long karen blong salem kakae blong winnim skul fee blong olgeta.. [**Hemi ko ahed blong mekem wok long garen nao.**]

Singsing:

Yu wandem se

Laef blong ol pikinini blong yu

I mo isi

Bitim laef blong yu!

Yu had wok evride

Yu no kat spel

Yu stap drim se bae ol pikinini oli save kat wan wok

Smol mane tu

Bae oli no nid

Blong wok had olsem yu

Wok had evride

Bae laef blong ol I mas mo isi smol

Bitim laef blong yu.

[**Harriet hemi wipem aot swet long hed blong hem.**]

Harriet: Be ioraet.. bae mi kat fulup kakae blong salem ino longtaem... **[Tom hemi ron ikam insaed.]**

Tom: Harriet!

Harriet: Tom?!

Tom: Junior hemi sik! Hemi feva koko.. Bae yu kam bak long haos nao ya! Kwik!

Harriet: Bae yumi karem hem iko long hospital Tom!

Tom: Rod ino kud Harriet! Trak ino save pass.. Mo solwora I ruf tumas...

Harriet: Bae yumi mekem wanem?

Tom: Ale bae yumi ko! **[Oli ron iko long sem ples we oli stap long hem, mo chorus hemi kam insaed. Harriet I folem toktok blong chorus nao ya.]**

Chorus: Lukim smol boe blong yu!

Filim hed blong hem!

Hemi hot we hemi hot

Yu fraet tumas

Olfala woman hemi kam blong mekem lif meresin blong hem

Be hemi no kam kud nating

Skin blong hem I olsem fir

Yu save nao

Yu save se

Bae hemi los ino longtaem..

Harriet: Tom! Yumi mas ko long hospital! Yumi mas finem wan wei! Tom!

Tom: Ale....

[Hemi ron iko smol blong singoatem wan trak.]

Kamiong ikam!

Yufala I mas ron long rabis rod ya

Klim antap long ol hil

Bae trak ya I save ko antap ono?

Ohh driva I winnim!

Harriet: Tank yu papa god!

Yu kasem hospital mo dokta hemi tok tok strong long yu!

Dokta: Malaria! Kolosup boe ya hemi ded from yu no bin kam from tritman!

Chorus: Yu harem no kud be

Boe blong yu hemi stap kam kud nao!

Hemi stap kam gud!

[Chorus oli los be Harriet mo Tom oli stap mo holem giamen bebe blong tufala.]

Harriet: Yumi stap sava olsem from rod blong yumi hemi no kud! Mo yumi no kat dispensary long vilij ya! Fromwanem nao iolsem Tom?

Tom: Hemi oraet nao Harriet! Yu no wari tumas...

Jif: Tom! Tom! **[Hemi wokbaot ikam.]** Ol man oli krossem flo! Oli wandem putum wan vot blong no konfidens!

Harriet: Papa god! **[Hemi no wandem save.]**

Tom: Tru? **[Tom hemi ko blong stori wetem jif ya.]**

Jif: **[Hemi stap wokbaot iko wetem Tom.]** Speka hemi no wandem harem toktok long saed blong vot ya... oli talem se bae ikat wan narafala elekson!

Harriet: Elekson bakegen? Mi lez!

[Harriet hemi ko karem bebe iko aotsaed. Ol akta oli kam insaed.]

Chorus: Bae yumi dring fri kava bakagen!

Bae yumi karem ol nuifala busnif!

Luk olfala MP blong yumi!

Kas hemi kam fat fat no kud we!

Hemi stap karem fulup tin fis I kam!

Harriet! Harriet! **[Harriet hemi ron ikam bak insaed.]**

Karem sam long ol tin ya!

Laki blong yumi!

Harriet: Yu stap salem vot blong yu blong tin fis ya?

Wom: Mi mi neva kasem eni samting aot long kovman! Tin fis ya nomo!

Chorus: Be yu bae yu yu vot long hu, Harriet? **[Oli askem Harriet.]**

Harriet: Mi?..... Ikat fulup kandidate I stap.. Hemia ol posta blong olgeta.... Ol kandidate ya oli talem wanem?

[Chorus oli stap point iko roan olsem we oli pointem ol difren posta.]

Chorus: Bae ikat elektrik mo wora long vilij ya!

Bae evriwan I mas kat wan kristian laef!

Hemi wandem se ol jif oli kat mo paoa!

Hemi talem se bae ikat fri education!

Mo hemia I wandem se ol man bae oli harem vois blong ol woman!

Mo hemia I talem se ino mas kat poa man long Vanuatu!

Hem bae I karem fulup developman I kam!

Mo man ya hemi talem se

Yumi mas holem taet kastom mo kulta blong yumi!

Bae oli mekem ol samting ya olsem wanem?

Harriet: Kas! Oli talem tumas samting... I kat plante tumas man I stan up.

Fromwanem nao olgeta evriwan ya, oli wandem kam ol MP?

Chorus: Sam oli wandem helpem yumi ol man ples

Be sam long ol

Oli wandem mane mo paoa!

Sapos we oli kam MP

Bae oli kasem salary

165,000 vatu long wan wan manis

Mo iet sapos we oli kam ol minista!

Bae ikat sitting allowance tu

7000 vatu long wan wan de we parliaman I sidaon!

Mo afta long sitting oli kasem

Travel allowance

Blong kam bak long ples blong ol!

Mo tu ikat MP's allocation!

1.2 million long wan wan yia

Blong karem developman I kam long aria blong ol!

Harriet: Fulup mane olsem! Man! 1.2 million blong karem developman I kam long yumi? I stap ko wea?

Chorus: Yu mas skalem kud toktok blong ol

Bifo we yu vot Harriet!
 Jusim wan man we bae hemi save yusum mane ya
 Long wan stret fasin!
 Skalem kud!

[Harriet hemi stan up mo hemi mekem olsem we hemi stap lukim ol posta ya.]

Harriet: Ikat wan long olgeta ya nomo we mi mi likem hem...littelbit! Okay! Bae mi ko vot long hem nao! **[Hemi I ron iko aot.]**

Chorus: Be hu bae I win?

Hu nao bae I kam MP blong yumi?

Oli stap kaontem ol vot nao!

Ol man oli stap lisen long radio blong finem aot! **[Harriet hemi ron ikam insaed bakegen. Jif hemi kam insaed hemi mekem olsem we hemi stap lisen long radio.]**

Jif: Kandidate blong yumi iwin bakagen! **[Chorus I cheer mo singaot. Harriet hemi kross.]** Mo numba tu MP blong aelan ya ... wan woman!? Hu ibin vot long hem?! **[Oli sek, afta oli freeze I stap.]**

Harriet: Kandidate blong mi nao! Ating bae evrisamting I mas jenis nao! Bae laef ikam mo kud... **[Hemi stat blong mekem wan wok, afta hemi stop mo hemi luk luk raon.]**

Chorus: Be six manis I pass finis

Mo yu no harem wan toktok nating

Long kandiate blong yu

Laef I stap semak olsem!

No kat wan samting nating I stap jenis!

[Chorus oli relax nao. Oli kam ol akta bakegen.]

Harriet: Yu luk! Yu luk! Evriwan I semak! Yumi no save trustim ol politician nating! Yu luk save nao fromwanem mi mi lez long politik? Mi mi lez! Bae mi nomo vot bakagen! Neva! **[Harriet toktok strong long ol akta ya. Oli fraet smol.]**

Akta 2: Slo doan!

Harriet: Slo daon? Kolosup boe blong mi ibin los from.. from ol MP ya oli no kae nating long laef blong yumi ol man ples! Olfala MP blong mifala, hemi bin stap long parliaman longtaem we longtaem! Be hemi neva mekem eni samting blong helpem mifala! Mo nui wan tu! Semak! Olgeta politician ya.. evriwan oli semak! Ahh! Yufala isave ko los! Mi enaf! **[Hemi kross tumas long ol.]**

[Hemi ronnem ol, mo hemi stap kilim ol wetem wan klos we hemi stap karem.]

Akta 3: Ahh! Mi talem long yufala finis.. ol man oli no wandem save long politik!

Akta 2: Harriet stop!

Harriet: Ko los! Mi no wandem save!

[Oli ron iko aot.]

Akta 1: Bae yu yu safa Harriet sapos we yu no finem aot wanem we kovman blong yu istap mekem!

[Hemi sakem klos ya afterem hem.]

Harriet: Ahhh! Kovman! Kovman! Mi no save wanem we oli stap mekem mo mi no kar tu! Mi mi kat wok blong mekem! **[Harriet hemi singsing nao.]**

Sing sing:

Mi kat wok blong mekem
 Mi kat laef blong mi
 Mi no save tinkbaot evrisamting
 We I stap happen long kaontri!
 Mi kat ol pikinini
 Mi kat man blong mi
 Mi no save westem taem long ol doti olsem!
 Mi kat klos blong washem
 Karen blong klinim tu!
 I kat ded, I kat marret,
 I kat skul fee tu!
 Mi kat wok blong mekem
 Mi kat laef blong mi!

[Harriet hemi emi sidaon olsem we hemi stap salem kakae long market. Wan man hemi kam pass mo hemi lukim wanem we hemi stap salem, mo hemi kivim mane long hem.]

Harriet: Tank yu! **[Hemi luki9m mane ya mo hemi toktok long hem wan.]** Smol mane blong skul fee....

Wom: Harriet! Harriet!

Harriet: Wanem?

Wom: Yu save helpem mi...

Harriet: Wanemi rong?

Wom: Mi mas ko long klinik be.. oli talem se pris blong dokta iko antap! Mi mi no kat enaf mane! Plis Harriet.. mi stap feva we. Mi harem no gud!

Harriet: Ale.. karem mane ya ... **[Hemi kivim mane blong hem long woman ya. Woman I kissim hem.]**

Wom: Tank yu! Tank yu Harriet! **[Hemi ron iko aot bakegen.]**

Harriet: Pris blong luk dokta iko antap?! Fromwanem? **[Hemi stap toktok be wan man hemi wokbaot ikam.]**

Harriet: Morning tija! Yu stap ko wea?

Tija: Bae mi nomo tij! Mi lez! Kovman ino wandem payem salary blong mi! Mi bae mi aot! Yufala nao yu save tijim ol pikinini blong yufala!

Harriet: Wanem?! Tija yu no ko! Yu kam bak!

Tija: Bae mi kam taem we mi kasem mane blong mi! **[Tija ya hemi ron iko aot.]**

Harriet: Ohhh no! Be fromwanem nao salary blong hem ino kat?

Man: Harriet! Harriet! Yu save wanem? Mi ko payem oil long stoa.. nao ya nomo! Be pris I ko antap! Iko antap bikwan!

Harriet: Yu tru?

Man: Yu ko luk!

Harriet: Ohh.. pris iko antap? Fromwanem? **[Hemi gerrup blong ko luk be woman ya hemi kam insaed bakagen. Kolosup hemi sperem Harriet. Harriet hemi sek.]** Kas! Yu bin luk dokta finis?

Wom: Yes.. be oli no kat meresin.. panadol nomo! **[Hemi ko aot, mo chorus oli kam insaed blong lisen long hem, afta long chorus oli chikim hem.]**

Harriet: No kat meresin?! Be... fromwanem nao I olsem? Wanem bae I happen sapos we pikinini blong mi hemi sik? Kovman I stap mekem wanem?

Chorus: Kovman?!

Be yu no kea nating long kovman Harriet!

Yu no wandem save wanem we oli stap mekem!

Yu no kat taem!

Yu no interest!

Yu bin talem se

Bae yu nomo vot bakegen!

Kovman ino kat samting blong mekem wetem laef blong yu!

Harriet: Shurru! Yu no save blamem mi! Mi mi no wandem se ol no gud samting I stap happen! Mi wandem se evri samting iko kud nomo! Ol sik man bae oli kasem tritman mo pikinini blong mi bae hemi save skol! Samting ya nomo mi wandem! Samting ya nomo!

[Chorus oli laf long hem.]

Chorus: Be yu nao yu rong Harriet!

Yu tink se ol samting bae I ko kud

Sapos yu no mekem wok blong yu

Blong vot long elekson

Blong fiem oat wanem we kovman blong yumi I stap mekem?

Yu tink se bae ol man oli mekem kud wok blong kovman Harriet

Sapos we yu no stap behaen long ol?

Akta 1: Yu kasem nao Harriet? Yu luk save se hemi wok blong yu blong folem wanem we istap happen long kovman? Wanem we ol politician I stap mekem? Yu nao yu mekem se democracy ya nao ino wok! Ino ol politician nomo!

Harriet: Umm.. atink..

[Ol akta oli klap, mo oli slappem olgeta long baksaed. Oli stap ko oat nao.]

Akta 3: Kas! Yu mekem hemi luk save!

Akta 4: Hemi kasem kud nao..

Akta 2: Bae hemi interest bikwan long politik nao ya...

Akta 1: Yumi mas tekem taen blong explanem ol samting ya long ol man .. afta bae ol samting I mas kam kud! **[Harriet I stap watchem olgeta iko aotsaed.]**

Ol: Ale Harriet!

Harriet: Man! Oli los! Tank yu papa god.. Yufala I tinktink wanem long toktok blong ol? Oli talem se yumi nao yumi mas mekem se kovman ya iwok kud. Yumi mas behaen long ol... Yu tink se I tru ono?

Sing sing:

Yumi stap long wan democracy

Mekem se yumi fri

Blong wokbaot blong talem yes o no

Blong kam, blong ko
Mama lo I kivim ol raet ya long yumi.
Be yumi stap komplain
Samtaem yumi sem
Long fasin we ol politician I mekem
Be hu I raet no rong?
Hu I spolem kaontri ya?
Ol bikman blong yumi
O yumi ol manples nomo?

Democracy!
Yumi mas wok long hem
Ino minim se yumi go vot nomo!
Democracy!
Yumi mas finemaot
Hoa blong mekem se I wok kud
Long kaontri ya!